

# यूहन्नां चवःगु न्हापांगु पौ

## म्हसीका

थ्व पतिइ निता मूर्खं दु — साहस यानाः परमेश्वर व वय्कःया काय् येशू ख्रीष्टलिसे छप्पं जुइगु व थथे छप्पं जुइगु पाखें अलग याइगु फताहा गुरूतय्गु शिक्षा पाखें बचय् जुया चवनेगु ख्याच्चवः। थज्याःगु शिक्षा कथं संसारय् च्वंपिं फुक्क मनूत चिप जुइ, उकिं येशू धात्थेनं मनू खइ मखु। इमिगु शिक्षा कथं मुक्ति कायेत संसारयागु च्यूताः तयेम्वाः, अले मुक्ति काये धुंकूम्ह मनूयागु चालचलन न्हाथे जूसां ज्यू।

यूहन्नां थज्याःगु शिक्षाया विरोध यानाः येशू ख्रीष्ट धात्थेयाम्ह मनू हे खः धकाः बांलाक ध्वाथुइका तःगु दु। अले येशूयात विश्वास याइपिं व परमेश्वरयात माया याइपिं मनूतय्सं थःथवय् नं माया याना चवनेमाः धकाः बः बियातःगु दु।

थ्व पौ ई.स. ६० पाखे चवःगु खः। यूहन्नाया सुसमाचार चवःम्ह प्रभु येशूया चेला यूहन्नां हे थ्व पौ चवःगु खः। व प्रभु येशूयात खंम्ह, थ्यूम्ह व वय्कःया सः न्यंम्ह चेला खः। थ्व पौ चवःगु इलय् व बुह्वा जूइ धुंकूगु खः। अथेजूया वं थ्व पतिइ चेलातय्त मस्तय्त थें धयाच्वंगु दु।

## धलः पौ

न्हाखँ .....	१:१-४
जः व खिउँ .....	१:५-२:२६
परमेश्वरया मस्त व शैतानया मस्त .....	३:१-२४
सत्य व द्विबिद्वं .....	४:१-६
माया यायेगु .....	४:७-२१
विश्वासं त्याकेगु .....	५:१-२१

# १ यूहन्ना

## जीवन बीगु वचन

१ १न्हापांनिसें जीवन बीगु वचन दु। थ्व हे वचनया बारे जिमिसं च्वयाच्वनागु दु। थ्व हे वचन जिमिसं न्यनागु नं दु। जिमिगु हे मिखां खनागु नं दु, बांलाक स्वयागु नं दु, ल्हातं थियागु नं दु।\* २गुबले थ्व वचन जीवन जुया: जिमिथाय् खनेदय्क: भाल, उबलय् थ्व जीवनयात जिमिसं खना, जिमिसं साक्षी बी, अले छिमित नं धाये। थ्व बा:याके दुगु अनन्त जीवन जिमिथाय् खनेदय्क: भाल।\* ३जिमिसं न्यनागु व खनागु फुक्कं न्यंकागु दु। जिमिगु संगति बा: नाप व परमेश्वरया काय् येशू ख्रीष्ट नाप दुगुलिं छिमिसं नं जिपिं नाप संगति याये फयेमा धका: थथे धयाच्वनागु ख:। ४थथे जिमिसं छिमित च्वया: कना च्वने दुगुलिं जिपिं तसकं लय्ता:।

## परमेश्वर ज: ख:

५परमेश्वरया काय् नं बियादीगु शिक्षा हे जिमिसं छिमित बियाच्वना। परमेश्वर

ज: ख:। वय्क:याके खिउं हे मदु। ६भी वय्क:यागु संगतिइ दु धया: खिउंगुलिइ तुं च्वनाच्वन धा:सा भीपिं ज्याखें निताय् नं फताहा जुइ। ७वय्क: ज: जूथें, भीपिं नं जलय् च्वनाच्वन धा:सा छम्ह मेम्हनापं संगतिइ जुइ, अले परमेश्वरया काय् यागु हिं भीगु दक्व पाप पाखें शुद्ध यानादी।

८भीसं “भीके पाप मदु” धका: धा:सा भीसं थ:पिन्त हे ध्वखा ब्यूगु जुइ, अले सत्ययात मानय् मया:गु जुइ। ९अय् नं भीसं थ:गु पाप मानय् यात धा:सा परमेश्वरं भीगु पाप क्षमा यानादी, अले भीगु मनय् च्वंगु फुक्क पाप नं च्वत्तुक हुयादी, छाया:सा वय्क: भरोसा याये बह:म्ह व धर्मीम्ह ख:। १०“भीसं गुबलें हे पाप मयाना” धका: धाल धा:सा भीसं परमेश्वरयात फताहा या:गु जुइ। अले वय्क:यागु वचन भीके दइ मखु।

## येशू भीत ग्वाहालि याइम्ह ख:

२ १आय् जि य:पिं मस्त, छिपिं ला जिम्ह मस्त थें ख:। छिमिसं पाप

याये मते धकाः थ्व खँ जिं च्वया-  
च्वनागु खः। छुं जुयाः छिमिसं पाप  
याये लात धाःसा निरास जुइ मते,  
छाय्धाःसा भीत ग्वाहालि याइम्ह  
येशू ख्रीष्टं बाःया न्ह्यःने भीगु नितिं  
बिन्ति यानादी। २भीगु पापयागु नितिं  
जक मखु, संसारय् च्वंपिं फुक्क  
मनूतय्गु पापया नितिं वय्कः बलिदान  
जुयादीगु खः।

३परमेश्वरयागु आज्ञा मानय् याना  
च्वंसा जक वय्कःयात बांलाक  
म्हस्यू धकाः भीसं धाये फइ।  
४परमेश्वरयात बांलाक म्हस्यू धकाः  
धयाः वय्कःयागु आज्ञा मानय् याना  
मजूम्ह मनू फताहा खः। वयाके सत्य  
धयागु हे दइ मखु। ५परमेश्वरयागु  
वचन मानय् याना च्वंम्ह मनू जक  
धात्थें परमेश्वरया मायां जाःम्ह जुइ।  
थुकिं हे भीपिं परमेश्वरया मनू खः  
धकाः सी दइ। ६परमेश्वरया मनू खः  
धकाः धया जुइम्ह मनुखं येशू ख्रीष्ट  
थें जुइ फय्के माः।

### न्हूगु आज्ञा

७यःपिं दाजुकिजापिं, जिं छिमित  
च्वयाच्वनागु थ्व आज्ञा न्हूगु मखु,  
पुलांगु हे खः। थ्व आज्ञा परमेश्वरयात  
विश्वास याःबलय्निसें छिमित न्यंकूगु

खः, आः नं न्यनाच्वंगु हे दु।\* ८अय्न्  
थन धाःसा जिं छिमित छगू न्हूगु हे  
आज्ञा च्वयाच्वनागु दु। थ्व सत्य खः  
धकाः ख्रीष्ट पाखें हे सी दःवःगु दु,  
छाय्धाःसा खिउँ तना वनाच्वंगु दु,  
अले धात्थेंगु जः लुयावःगु दु।

९ख्रीष्टं जिगु नुगः यचुक सिलादीगु  
दु धकाः धया जुइम्ह मनुखं दाजु-  
किजापिन्त हेला यानाच्वन धाःसा  
आः तक नं वयागु नुगः हाकुसे हे  
च्वं नि। १०दाजुकिजापिन्त माया याना  
जुइम्ह मनूयागु नुगः ख्रीष्टं यचुका-  
दीगु दु धकाः सी दु, उकिं वयागु  
नुगलय् हाकु धयागु हे दये फइ मखु।  
अय्जुगुलिं वं सुयातं पाप याकी  
मखु। ११अय्न् दाजुकिजापिन्त हेला  
याना जुइम्ह मनू खिउँथाय् लाइ। अले  
खिउँथाय् हे जुइ। वं थः गन वनाच्वना  
धकाः सी मखु, छाय्धाःसा वयागु  
मिखा खिउँगुलिं कां जुइ।

१२आय् जि यःपिं मस्त,  
ख्रीष्टयागु नामं यानाः  
छिमिसं याःगु फुक्क पाप  
परमेश्वरं क्षमा यानादिल।

१३जिं बौपिन्त नं थ्व खँ  
च्वयाच्वनागु खः,  
छाय्धाःसा छिमिसं

न्हापानिसें दीम्ह  
 ख्रीष्टयात बांलाक म्हस्यू।  
 शैतानयात त्याके धुंकूपिं  
 ल्याय्म्ह व ल्यासेपिन्त नं  
 जिं थ्व खँ च्वयाच्वना।

१४मस्तय्सं नं भी परमेश्वर  
 बा:यात म्हस्यूगुलिं छिमित नं  
 जिं थ्व खँ च्वयाच्वनागु ख:।  
 बौपिन्सं न्हापानिसें दुम्ह परमेश्वर  
 बा:यात म्हस्यूगुलिं  
 जिं थ्व खँ च्वयाच्वना।  
 बल्ला:पिं ल्याय्म्ह व ल्यासेपिं,  
 छिमिगु नुग: परमेश्वरयागु  
 वचनं जाया च्वंगु दु।  
 उकिं छिमिसं शैतानयात  
 त्याके फत।  
 उकिं जिं छिमित नं  
 च्वयाच्वनागु दु।

### संसारयात माया याये मते

१५थ्व संसारयात माया याये मते।  
 थ्व संसारय् च्वंगु चिजबिजयात नं  
 ल्व:वंके मते। संसारयात माया याना  
 जुइम्ह मनुखं परमेश्वरयात माया याइ  
 मखु। १६थ्व संसारय् च्वंगु फुक्क  
 ज्याखँ गथे बांमला:गु मभिंगु ज्याखँ  
 याये मास्ति वय्केगु, मिखां खंक्व  
 काये मास्ति वय्केगु, अले त:धंछुया:  
 फुइँफाँय् याना जुइगु। थ्व फुक्क  
 परमेश्वर बा:या पाखें मखु, संसारया

पाखें हे दया व:गु ख:। १७थ्व संसार  
 व थ्व संसारय् च्वंगु मनूतय्सं यय्का  
 जुइगु नं फुक्कं मदया वनीतिनि। तर  
 परमेश्वरयागु इच्छाकथं जुइम्ह मनू  
 न्हाबलें दयाच्वनी।

### ख्रीष्टया शत्रु

२ थ्रेसलोनिकी २:१-१२

१८अय् जि य:पिं मस्त, थ्व संसार  
 याकनं हे फुना वनिन। ख्रीष्टया शत्रु  
 वइतिनि धका: छिमिसं न्यना त:गु  
 दु। ख्रीष्टया शत्रुत खने दया वये  
 धुंकल। अय्जूगुलिं थ्व संसार याकनं  
 हे फुना वनिन धका: भीसं सीके फु।  
 १९इपिं भीगु पुचलं पिहां वने धुंकल,  
 छाय्धा:सा इपिं भी मनूत मखु। इपिं  
 भी मनूत ख:सा भीपिं नाप हे च्वनिगु  
 ख:। भीगु पुचलं पिहां वंगुलिं इपिं  
 भी मनूत मखु धका: सी दत।

२०ख्रीष्ट छिमित पवित्र आत्मा  
 बियादीगु दु, उकिं छिपिं थुपिं थें  
 मखु। अय्जूगुलिं सत्य छु ख: धयागु  
 छिमिसं स्यू। २१छिमिसं सत्ययात  
 मस्यू धका: जिं थ्व च्वया च्वनागु  
 मखु। सत्ययात स्यूगुलिं हे जिं थ्व  
 च्वयाच्वनागु ख:, छाय्धा:सा सत्य  
 पाखें मखुगु खँ पिहां वइ मखु धका:  
 छिमिसं सि हे स्यू। २२अय्सा मखुगु  
 खँ ल्हाना जुइम्ह सु ख: ले सा? येशू  
 धा:म्ह मुक्ति बीम्ह ख्रीष्ट मखु धका:

धया जुइम्ह मनू हे मखुगु खँ ल्हाइम्ह खः। थज्याःम्ह मनू ख्रीष्टया शत्रु खः। थज्याःम्ह मनुखं परमेश्वर बाः व वय्कःया काय् निम्हय्सितं इन्कार याइ। २३ परमेश्वरया काय्यात मानय् मयाइम्ह मनुखं परमेश्वर बाःयात नं मानय् याइ मखु। अले वय्कःया काय्यात मानय् याइम्ह मनुखं परमेश्वर बाःयात नं मानय् याइ।

२४ अय्जुगुलिं छिमिसं न्हापांनिसं न्यना तःगु परमेश्वरयागु वचनयात दुनुगलय् तया ति। अथे याःसा छिपिं परमेश्वर बाः व परमेश्वरया काय् नाप चवने दइ। २५ ख्रीष्टं भीत बी धकाः धयादीगु अनन्त जीवन थ्व हे खः।

२६ थज्याःपिं ख्रीष्टया शत्रुतय्सं छिमित मखुगु लँय् यंकी धकाः कनाबीत थ्व खँ चवयाचवनागु खः। २७ अय्न् ख्रीष्टं छिमिगु नुगलय् पवित्र आत्मायात तयादीगु दु, उकिं सुनानं छिमित स्यने माःगु मदु। पवित्र आत्मां छिमित फुक्कं स्यनादी। वय्कः सत्य खः, गुबलें मखुगु खँ ल्हानादी मखु। पवित्र आत्मां गथे स्यनादिल, अथे हे यानाः छिपिं ख्रीष्ट नाप चवना च्वँ।

२८ अय् जि यःपिं मस्त, ख्रीष्ट नाप चवना च्वँ। अले जक ख्रीष्ट हानं थन भायादीबलय् भीपिं ग्याये माली

मखु, अले वय्कः खनाः लज्या चाये माली मखु।

२९ ख्रीष्ट भिंम्ह खः धकाः छिमिसं स्यू। अय्जुगुलिं छिमिसं भिंगु बांलाःगु जक याना जुइपिं मनूत परमेश्वरया सन्तान खः धकाः सीका ति।

### परमेश्वरया सन्तान

३ १ स्व, परमेश्वर बाःनं भीत गुलि माया यानादीगु दु। उकिं हे भीत परमेश्वरया सन्तान धकाः धाःगु खः, धात्थें खः नं खः। अय्जुगुलिं हे थ्व संसारयापिं मनूतय्सं भीत म्हमस्यूगु, छाय्धाःसा इमिसं वय्कःयात म्हमस्यू\* २ आय् जि यःपिं मस्त, आः ला भीपिं परमेश्वरया सन्तान खः धकाः भीसं स्यू। अय्न् लिपा भीपिं गज्याःपिं जुइ धयागु खँ भीत कना मदीनि। अय्सां ख्रीष्ट भायादीबलय् भीपिं वय्कः थें हे जुइतिनि धकाः भीसं स्यू। अले तिनि वय्कः गथे च्वं धकाः भीसं खनी। ३ थथे ख्रीष्टयाके आशा याना च्वपिं वय्कः थें पवित्र जुयाः चवने माः।

४ सुनां पाप याइ वं व्यवस्था मानय् मयाःगु जुइ, छाय्धाःसा व्यवस्था मानय् मयायेगु हे पाप खः। ५ भीगु पाप मदय्केत हे ख्रीष्ट भायादीगु

खः। ख्रीष्टयाके पाप द हे मदु।\*  
६ ख्रीष्टयाके चवना च्वंपिन्सं पाप  
याइ मखु। पाप याना च्वनिम्ह मनुखं  
ख्रीष्टयात गुबलें हे खनी नं मखु, म्ह  
नं सी मखु।

७ अय् जि यःपिं मस्त, छिमित सुनानं  
मखुगु लँय् यंके मफयेमा। गथे ख्रीष्ट  
धर्मी खः अथे हे भिंगु ज्या याइपिं मनूत  
नं धर्मी खः। ८ शैतानं न्हापांनिसें पाप  
याना वयाच्वंगु दु, उकिं पाप यानां तुं  
च्वनिपिं मनूत नं शैतानया मनू खः।  
अथे जूगुलिं शैतानयागु ज्या स्यंकेत  
परमेश्वरया काय् थन भायादी माःगु  
खः। ९ परमेश्वरया पाखें ब्रूमहय्सिनं  
पाप यानां तुं च्वनी मखु, छायाःसा  
इपिं वय्कः थें जुइ। अले वय्कः हे  
इमि बाः जूगुलिं नं इमिसं पाप यानां तुं  
च्वने फइ मखु। १० परमेश्वरया सन्तान  
व शैतानया सन्तान थुकिं हे बांलाक  
सी दइ। बांलाःगु भिंगु ज्या मयाइम्ह,  
अले थः दाजुकिजापिन्त माया  
मयाइम्ह मनू परमेश्वरया सन्तान मखु।

### थःथवय् माया याना च्वँ

११ थःथवय् माया याना च्वने माः  
धकाः धाःगु खँ ला छिमिसं न्हापां-  
निसें हे न्यनातःगु दु।\* १२ भीपिं  
कयिन थें जुइ मज्यू। कयिन शैतानया

मनू जूगुलिं वं थः हे किजा हाबिलयात  
स्यात। कयिनं थः हे किजायात छाया  
स्यात? कयिन शैतानया मनू जूगुलिं  
वया किजां भिंगु बांलाःगु याना  
जूगु स्वये मफयाः वं थः किजायात  
स्यात।\* १३ यःपिं दाजुकिजापिं, उकिं  
थ्व संसारयापिं मनूतय्सं छिमित हेला  
यात धकाः छिपिं अजूचाये माःगु मदु।

१४ भी मृत्युं जीवनय् न्हाये धुन  
धयागु थुकिं हे सी दु। भीसं थः  
दाजुकिजापिन्त माया याना। थः  
दाजुकिजापिन्त माया मयाइम्ह मनू  
कालयागु ल्हातय् हे लानाच्वनी।\*  
१५ दाजुकिजापिन्त हेला याइम्ह मनू  
ज्यानमारा खः। अले ज्यानमारायाके  
अनन्त जीवन दइ मखु।

१६ थुकथं भीसं माया धयागु  
छु खः धकाः स्यू — भीगु नितिं  
ख्रीष्ट सिनादिल, उकिं भीसं नं भी  
दाजुकिजापिनिगु नितिं सीत तकं  
लिफः स्वये मज्यू। १७ तःमिम्ह मनुखं  
थः दाजुकिजापिनि नये मखं धकाः  
सियाः नं इमित माःगु ग्वाहालि  
मब्यूसा, अज्याःम्ह मनुखं परमेश्वरयात  
माया याना धकाः गथे धाये फइ?

१८ अय् जि यःपिं मस्त, भीसं म्हुतुं  
जक माया याना धयां मज्यू। ज्याखँय्  
नं धात्थेंगु माया याना क्यने फये माः।

१६ थुकिं हे भीपिं सत्यपिं खः धकाः सीका काये फु। अले परमेश्वरया न्ह्यःने धुककं चवने फु। २० भीत भीगु हे नुगलं दोषी ठहरय् याइ धाःसा परमेश्वर ला भीगु नुगः स्वयाः नं तःधं। वय्कलं मस्यूगु छुं नं मदु।

२१ अय्जूगुलिं यःपिं दाजुकिजापिं, भीगु मनं भीत दोषी ठहरय् मयाःसा भीपिं परमेश्वरया न्ह्यःने ग्याये माली मखु। २२ वय्कलं धयादीगु मानय् जुयाः वय्कःयात यःयःगु जक याना जूसा वय्कःयाके न्ह्यागु फ्वंसां भीत बियादी।

२३ वय्कलं भीत आज्ञा यानादीगु थ्व हे खः — वय्कःया काय् येशू ख्रीष्टयात भीसं विश्वास याये माः। दाजुकिजापिन्त माया यानाचवने माः। थथे हे याना च्वँ धकाः ख्रीष्टं नं भीत धयादीगु दु।\* २४ परमेश्वरयागु आज्ञा मानय् याना च्वंमह मनु वय्कः नाप दइ, अले वय्कः व नाप दइ। भीगु नुगलय् पवित्र आत्मा तयादीगुलिं भीसं थ्व स्यू।

### सत्य व असत्य आत्मा

४ १ यःपिं दाजुकिजापिं, आत्मा दु धकाः धया जुइपिं न्ह्या-मह्यसित नं विश्वास याये मते। न्हापां

परमेश्वरयागु आत्मा खः मखु धकाः निं जाँचय् याना स्व, छायाधाःसा यक्व हे फताहा अगमवक्तात खने दया वयाच्वंगु दु। २ सुनां ख्रीष्ट धात्थें हे मनु जुयाः भायादीगु खः धकाः धाइ व मनूयाके परमेश्वरयागु आत्मा दु। थुकिं हे परमेश्वरया आत्मा म्हसी। ३ सुनां ख्रीष्ट मनु जुयाः भायादीगु मखु धकाः धाइ, व मनूयाके ख्रीष्टया शत्रुयागु आत्मा दु धकाः सीकि। व वइ धकाः छिमिसं न्यनातःगु दु। व आः नं संसारय् दनि।

४ अय् जि यःपिं मस्त, छिपिं परमेश्वरया मनूत खः, उकिं अज्याःपिं फताहा अगमवक्तातय्त छिमिसं बुका छ्वःगु दु। थ्व संसारय् च्वंमह आत्मा स्वयाः छिमिगु नुगलय् च्वनादीमह आत्मा तसकं बल्लाः। ५ इमिसं ला थ्व संसारय् च्वंगु खँ जक स्यने फु। अले संसारयापिं मनूतय्सं इमिसं धाःगु खँ मानय् नं जुइ। अथेजू-गुलिं इपिं फुककं थ्व हे संसारयापिं मनूत खः। ६ भीपिं धाःसा परमेश्वरया मनूत खः, उकिं वय्कःयात बांलाक म्हस्यूपिन्सं भीगु खँ न्यनी। वय्कःया मनूत मखुसा भीगु खँ नं इमिसं न्यनी मखु। थथे भीसं परमेश्वरं धाःगु व मनूतय्सं धाःगु खँ सीके फइ।

### परमेश्वर माया खः

७यःपिं दाजुकिजापिं, भी थःथवय् माया याना च्वने माः, छायाःसा माया धयागु परमेश्वरपाखें वःगु खः। अय्जुगुलिं माया याना जुइम्ह मनुखं वय्कःयात बांलाक म्हस्यू, उकिं थज्याःपिं मनूत वय्कःया सन्तान खः। ८परमेश्वर प्रेम खः, उकिं माया याये मसःम्ह मनुखं वय्कःयात म्हसी मखु।

९परमेश्वरं भीत माया यानादीगु दु धकाः थुकिं हे सी दु — भीत जीवन दयेमा धकाः वय्कलं थः याकः काय्यात संसारय् छ्वया हयादिल। १०भीसं परमेश्वरयात माया यानागु मखु, बरु वय्कलं हे भीत माया यानादीगुलिं भीगु पाप क्षमा याना बीत थः हे काय्यात बलिदान यायेत छ्वया हयादिल — माया धयागु थ्व हे खः।

११यःपिं दाजुकिजापिं, परमेश्वरं हे भीत थथे माया यानादिल धाःसा भी थःथवय् नं माया याना च्वने माः। १२परमेश्वरयात सुनानं खंगु मदुनि। तर भी थःथवय् माया याना च्वंसा वय्कः भीगु नुगलय् च्वनादी। अले वय्कःयागु मायां भी जाइ।\*

१३वय्कलं भीगु नुगलय् आत्मा तयादीगुलिं वय्कः भीगु नुगलय् च्वनादीगु दु धकाः भीसं सी। अले भी वय्कःयाके दु धकाः नं सी। १४थ्व संसारयापिं मनूतय्त मुक्ति बीत परमेश्वर बाःनं थः काय्यात छ्वया हयादीगु जिमिसं खना। थ्व हे खँ जिमिसं कना वयाच्वनागु खः। १५येसू परमेश्वरया काय् खः धकाः धया जुइम्ह मनूयागु नुगलय् परमेश्वर च्वनादी। व हे वय्कःयाके च्वंम्ह खः। १६अले भीत परमेश्वरं माया यानादिल धकाः भीसं सि नं स्यू, अले विश्वास नं याना।

परमेश्वर माया खः, उकिं माया याना जुइम्ह मनूयागु नुगलय् वय्कः दयाच्वनी। अले परमेश्वर व नाप दइ। १७थुकथं भी मायां जाये धुंकाः न्याय याइबलय् मग्यासे परमेश्वरया न्हाःने वने फइ, छायाःसा वय्कः गथे खः थ्व संसारय् भी नं अथे हे खः।

१८माया याइपिं ग्याये म्वाः। धात्थेंयागु मायां ग्याःचिकु मदय्का छ्वइ। ग्याःम्हय्सित सजाँय बी, छायाःसा ग्याइपिन्के धात्थेंयागु माया दइ मखु। १९परमेश्वरं भीत न्हापालाक माया यानादीगुलिं भीसं नं वय्कःयात माया यानागु खः।



२० वय्कःयात जिं माया यानागु दु धकाः धया जुइम्ह मनुखं दाजुकिजापिन्त हेला याना जूसा थज्याःम्ह मनु फताहा खः धकाः सीकि। मिखां खंपि थः दाजुकिजापिन्त माया मयाइम्ह मनुखं मिखां मखंम्ह परमेश्वरयात माया याये फइ मखु। २१ अय्जूगुलिं ख्रीष्टं भीत थथे याना च्वं धकाः धया थकूगु खः — “परमेश्वरयात माया याइम्ह मनुखं थः दाजुकिजापिन्त नं माया याये माः।”

### संसारयात गथे यानाः त्याकेगु?

**५** १ येशूयात मुक्ति बीम्ह ख्रीष्ट खः धकाः विश्वास याना जूपिं मनूत परमेश्वरया सन्तान खः। परमेश्वर बाःयात माया याइम्हय्सिनं वय्कःया काय्यात नं माया याइ। २ वय्कःयात माया याना च्वंसा व वय्कःयागु आज्ञा मानय् याना च्वंसा भीसं धात्थें वय्कःया मस्ततय्त माया यानाच्वनागु दु धकाः सी दइ। ३ परमेश्वरयागु आज्ञा मानय् यायेगु हे वय्कःयात माया यायेगु खः। वय्कःयागु आज्ञा मानय् यायेत थाकु मजू।\* ४ वय्कःया सन्तानतय्सं थ्व संसारयात बुकी। वय्कःयात विश्वास यानागुलिं भीसं संसारयात त्याके फइ। ५ सुनां संसार-

यात त्याके फइ? येशूयात परमेश्वरया काय् खः धकाः विश्वास याना जुइपिन्सं जक थ्व संसारयात त्याके फइ, मेपिन्सं त्याके फइ मखु।

६ येशू ख्रीष्ट थ्व संसारय् भायादीगु निता दसि दु — लः व हि। मनु थें जुयाः बप्तिस्मा कयादीगु दसि खः — लः, अले हानं मनूतय्गु पाप क्षमा यायेत येशू सिनाः थःगु हि हाय्कादीगु दसि खः — हि। सत्यम्ह पवित्र आत्मां नं थ्व हे खं साक्षी बियादिल। ७,८ येशू परमेश्वरया काय् खः धकाः थ्व स्वतां बांलाक कयं — पवित्र आत्मा, लः व हि। ९ भीसं मनुखं हे ब्यूगु साक्षीयात पत्याः याना। परमेश्वरं ब्यूगु साक्षी भन पत्याः याये बहः जू। वय्कलं थःहे काय्यागु साक्षी बियादिल। १० अय्जूगुलिं वय्कःया काय्यात विश्वास याना च्वंपिं मनूतय्सं थ्व खं सत्य खः धकाः स्यू। परमेश्वरयात विश्वास याइ मखुपिन्सं वय्कःयात फताहा ताय्की, छायाःसा परमेश्वरं थः काय्यागु बारे बियादीगु साक्षीयात इमिसं विश्वास याइ मखु।

११ थ्व खंयागु दसि थ्व हे खः — परमेश्वरं भीत अनन्त जीवन बियादीगु दु। थ्व अनन्त जीवन वय्कःया काय्याके दु।\* १२ सुयाके काय् दु

वयाके थ्व अनन्त जीवन दइ, सुयाके परमेश्वरया काय् मदु वयाके थ्व अनन्त जीवन दइ मखु।

### अनन्त जीवन

१३ परमेश्वरया काय् येशूयात विश्वास या:गुलिं छिमिके अनन्त जीवन दु धयागु खँ थुइमा धका: थ्व खँ छिमित च्वयाच्वनागु खः। १४ वय्क:या इच्छाकथं भीसं न्ह्यागु फ्वंसां वय्कलं बियादी धका: भीसं स्यू। उकिं भीपिं वय्क:या न्ह्य:ने वनेत गयाये मा:गु मदु। १५ भीसं प्रार्थनाय् न्ह्यागु फ्वंसां वय्कलं भीगु खँ न्यनादी धका: स्यूगुलिं वय्क:याके फ्वनागु वय्कलं बियादी धुंकल धका: नं स्यू।

१६ सुनानं थ: किजायात सी म्वा:लिगु पाप यानाच्वंगु खंसा वं थ: किजायालागिं प्रार्थना यायेमा:। परमेश्वरं वयात जीवन बियादी। तर थ्व धा:सा सि म्वा:लिगु पाप या:पिनिगु

नितिं जक खः। सी मालिगु पाप नं दु। तर जिं छिमित थुक्रिया लागि प्रार्थना या धका: धाये मखु। १७ मभिगुं बांमला:गु ज्याखँ फुक्कं पाप हे खः। अयनं सीम्वा:लिगु पाप नं दु।

१८ परमेश्वरया सन्तानतय्सं पाप यानां तुं च्वनी मखु। वय्क:या काय् नं अज्या:मह मनूयात शैतानं थी मफय्क बचय् याना तयादी। १९ भीपिं परमेश्वरया सन्तान खः, अले थ्व संसारय् च्वंपिं मेपिं फुक्क मनूत शैतानया मनूत खः धका: नं भीसं स्यू।

२० परमेश्वरया काय् भाया: भीत धात्थेंयाम्ह परमेश्वर महसीकादिल। थ्व खँ भीसं स्यू। धात्थेंयाम्ह परमेश्वरया काय् येशू ख्रीष्ट नाप भीगु जीवन नं प्यपुना च्वंगु दु। थ्व हे सत्य परमेश्वर खः, अले हानं थ्व हे परमेश्वर अनन्त जीवन नं खः।

२१ उकिं अय् जि य:पिं मस्त, मूर्ति-पुजा पाखें तापाक च्वं।